



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

**Ioannis Evsebii Nierembergii Madritensis Ex Societate  
lesv De Adoratione In Spiritv Et Veritate Libri Qvatvor**

**Nieremberg, Juan Eusebio**

**Antverpiæ, 1631**

Cap. XI. Quâ ratione diligendi sint proximi.

[urn:nbn:de:hbz:466:1-46187](https://nbn-resolving.org/urn:nbn:de:hbz:466:1-46187)

bi, & esse verè & pacificè dominum tui. Denique si vis scire, quàm vtilius sit odisse se, opus est vt cognoscas quantum distet gratia à peccato & virtus à vitio: tantò fructuosius est odisse se ex virtute, quàm se amare ex vitio. Si homines oderunt cum pernicie proprià eos qui nocuerunt sibi, minus quàm tu te læsisti; tu cum virtute, laude, & præmio, te habes odio, qui plus omnibus tibi nocuisti.

## C A P V T X I.

*Quà ratione diligendi sint proximi.*

**O** Veritas amabilis, da mihi vt amem te super omnia, & omnès propter te: da te amicis meis, & omnibus iis quibus benè volo, non diuitias, & bona falsa atque indigna amore. Disce spiritus infirme sine iniurià amare. Sæpè dilectionis modus adæquatur odio aut contumeliæ. Magnam irrogabis iniuriam amico, quem amas, si optes illi diuitias tamquam verum bonum: excellentiùs enim, quàm ipsum, illas diliges: nam eas amas vt sufficientiam, illum vt egentem; quare libentiùs carebis illo, quàm istis. Hinc fortuna, arbitra amicitiarum; & mutatio eius, est mors amoris, & natiuitas perfidiæ. Hinc æquale periculum sinceræ fidei, siue ames amicum propter diuitias, aut diuitias amico.

Sicut

Sicut veræ amicitiaë similis est ratio, cum amas omnes propter Deum, & cum Deum solum illis amas, quia Deum solum diligis. Nihil aliud quam Deum desiderares omnibus, si propter nullam aliam rem amares. Hoc examen tui amoris erit, an vera charitas sit. Qualia vota, talia beneficia. Non potest alteri amare diuitias, qui non amet etiam diuitias. Sit Deus beneficium commune à te donandum omnibus: quem si dederis, satis diuites relinques. Et plus cures beneficia quibus omnes ames, quam quibus amaberis ab omnibus: nam qui omnes verè amat vt oportet, saluabitur; sed non propterea erit saluus, quòd ab omnibus ametur.

Nullâ mercede vendendus & vilipendendus est amor: gratis semper prodigatur. Deum vendit, qui charitatem impendit alicui, nisi propter ipsam: nam Deus charitas est. Nulli obicias beneficia tua: sed quemadmodum putas Dei munus esse quidquid boni tibi fit ab aliis, & Deo totam gratiam refers; ita beneficium Dei æstima, non tuum, quidquid aliis exhibueris: imò reputa maius beneficium tibi factum à Deo, quòd te elegerit, vt instrumentum & vicarium suum ad benefaciendum. Amorem ab aliis non concilies de temporalibus, sed in spiritu: nam quod diffunditur per temporalia, & non per  
 Spiritum

Spiritum sanctum, cupiditas est, non charitas; non amor hominis, sed auaritia rerum. Simili modo benefac aliis, ut vis quod Deus benefaciat tibi. Omnia eadem lege fac cum aliis, ac Deus tecum. Concede, o Amor amorum, ut omnes amem, sicut tu amasti me, & amasti illos: concede ut omnes amem propter te, & nullus me amet propter me. Mallem, si fieri sine peccato posset, ut omnes me odissent, quam quod me amarent, si propter me amarent: nam si omnes odissent, haberem quod est meum; si propter me amarent, usurparem quod est tuum. Impurus est omnis amor, qui non sit propter Deum. Solum amor Dei sincerus est & defæcatus, cum non permisceat, nec compatiatur secum mixtionem contrarij affectus. Ceteri amores, aut inuidiæ aut iræ aut odij causæ solent esse, vel aduersus ipsum amatum, vel aduersus alios. Amor Dei constans, & æternus est; ceteri fugaces & alati. Lucrum igitur erit, ut amer propter te Deus mi, & non propter me.

CA-